

Vinars 6 e sabide 7 di Dicembar al Teatri San Zorç a Udin

Licôf: si alce il sipari sul Teatri Stabil Furlan

La associazion Teatri Stabil Furlan e scree la sô ativitât vinars 6 e sabide 7 di Dicembar al Teatri San Zorç a Udin cun "Licôf", doi dîs di incuintris, menadis e iniziativis cun scritôrs di dramis, atôrs e regjiscj, cun chê di dâ valôr al patrimoni de tradizion teatrâl furlane.

“Fâ licôf” par furlan al vûl dî screâ cuntune bevude la cjase a pene finide di fâ sù. Cun chest spirt la associazion TSF, metude adun di pôc in grazie de idee e de intenzion di Nico Pepe tal 1979 e puartade indenant cun impegn di Bepi Agostinis, e à volût cjapâ dentri regjiscj, atôrs e dramaturcs furlans par dâ vite a doi dîs di spetacui.

Il coordinadôr artistic Massimo Somaglino al à individuât sîs ambits, di mût che ognidun al è stât assegnât a un autôr di dramis ch'al à presentât un test, ch'al larà in sene intune version plui curte, une sorte di *trailer* di uns vincj minûts.

Il "Licôf", ven a stâi la inaugurazion, e varà ancje il zovament de presince di studiôs e operadôrs leâts al mont de culture furlane tant che Gianni Cianchi, Francesca Gregoricchio, William Cisilino e Paolo Patui, ch'a presentaran e a scrutinaran i tescj teatrâi proponûts.

Vinars ai 6 di Dicembar aes 7 di sere al vignarà rapresentât, cu la regjie di Serena Di Blasio, "FOUR" di Claudio Moretti, Fabiano Fantini e Elvio Scruzzi, il test proponût di Carlo Tolazzi pa l'ambit 'Dramaturgjie di vuê'. A metisi tai bregons dai trê *ultras* imboreçâts ch'a si cjatin di fûr dal stadi in spiete dai biliets pe partide di Cope de lôr squadre dal cûr, a saran Daniele Fior, Renato Rinaldi e Valdi Tessaro.

Aes 8 di sere e sarà la volte di "Marta", test proponût de farie di dramaturgjie MateâriuM pal ambit 'Gnovis propuestis' e scrit di Alessandro Di Pauli, Stefania Ursella e Dario Paolo D'Antoni. La regjie e je par cure di Paolo Nikli e a fâ la part di Marta Fiascaris, sandaneline protagoniste dal procès plui documentât e plui cuntindût de Incuisizion dal Sîscent, e sarà la vôs di Alida Talliente, compagnade des musichis di Daniele Ceccato.

Aes 9 al sierarà la serade "La cjase", prin drame teatrâl di Siro Angeli, poete, dramaturc e senegjadôr nassût a Cesclans in Cjargne tal 1913 e muart a Tumieç tal 1991. Il test proponût di Paolo Patui pal ambit 'Teatri di tradizion' al larà in sene cu la regjie di Carlotta Del Bianco e injenfri ai atôrs ch'a daran vite ae cjase cjargnele salvade dal drame de emigrazion, a saran ancje Caterina Comingio e Alessandro Maione.

Sabide ai 7 la rassegne si tornarà a vierzi aes 7 di sere cun “Il diaul e la gubane”, test scrit de autore di poesiis, contis, romançs, cjançons e spetacui teatrâi par fruts e zovins, Chiara Carminati, che lu à proponût pe sezion 'Teatri pai zovins'. La liende su l'orijin de gubane, dolç tipic des Valadis dal Nadison, e je stade voltade par furlan di Priscilla De Agostini e adatade pal teatri dai pipinots di Michele Polo e Patrick Platolino, cu la particulâr narazion di Sonia Cossettini.

Aes 8 di sere, pe regjie di Claudio Mezzelani, e larà in sene “Lis feminis di Gregoricchio”, misture di tescj di Gianni Gregoricchio adatâts e proponûts di Paolo Sartori pal ambit 'Adataments teatrâi' e interpretâts di Anna Pia Bernardis e Katia Zuiani.

La rassegne si sierarà aes 9 di sere cun “L'ùALI DI DIU” di Miklos Hubay, voltât di Carlo Tolazzi te varietât di furlan de Val Pesarine e presentade tal ambit des 'Traduzions' di Massimo Somaglino ch'al à metût man ancje te regjie. Il titul origjinâl, "Elnémulás" al vûl dî “Fâ tasê” e la tragedie, ch'e sarà interpretade di Alida Talliente e Marco Rogante, e ven dedicate dal dramaturc ongjarês ae muart di une lenghe e ae difese che i covente.

Cun "Licôf", tal ultin, il Teatri Stabil Furlan al vûl ufrî al public cualchi cerce di gjenars teatrâi par furlan, cu la intenzion di nudrî par podopo realizâ i progjets ch'a prometin pal miôr in plen acuardi cu lis realtâts ch'a si impegnin pe valorizazion dal teatri furlan.

L'Associazione Teatri Stabile Furlan e met dongje Comune di Udine, ARLeF (Agenzie Regionâl pe lenghe furlane), Societât Filologjiche Furlane, Associazione Pre Checo Placerean, Fondazione Teatro Nuovo "Giovanni da Udine", CSS Teatro Stabile di Innovazione del Friuli Venezia Giulia e Civica Accademia d'Arte Drammatica "Nico Pepe".

Info:

Udin, Teatri Palamostre, plaçâl Paolo Diacono 21

tel +39 0432 506925 fax +39 0432 504448

biglietteria@cssudine.it

orari: di lunis a sabide 17.30 - 19.30

Lis seris di spettacul la biletarie dal teatri San Giorgio e vierç un'ore prin dal principi dai spettacui.

Biliets euro 2,00